

## 詩若干首

董就雄

### 五

中華白海豚二首（2006年5月23至24日）

珠江紅粉客，疑似北溟鯤。直立探頭顧，前衝競浪奔。躍身彎半月，潛水去無痕。海闊青天逸，逍遙任意翻。

世道嶮巖盡，逍遙偏觸藩。汗流思滅族，黑網欲勾魂。友善吉祥物，唏噓殘朽根。天心常示警，豈獨為斯豚。

夜遊江灘未果因賦並呈一郡兄（2006年5月29日）

楚天雄極目，江畔柳條輕。照喜憑欄攝，船留逐水鳴。頗憐灘景麗，欲聽晚風清。寂寞燈紋盪，宵遊若少兄。

### 七

感遇（2005年6月11日）

風騷初接感幽微，幸賴良師引燭輝。青眼顧垂恩早種，鳳

書點鐵夜遲歸。可憐雲路多魑魅，欲進閭門復困圍。警竦親承徒幻夢，更勞明月照鄰扉。

### 恭和章刃師兄賜寄（2005年6月16日）

吾兄磊落豈為顛，欲效陶公日運磚。縱遇瘟神添夢魘，敢持漢節對羊羶。青燈夜語愁懷逸，綠蠟銀叉友誼堅。七載脩能明月鑒，朝陽冉冉出關前。

### 敬和 穎麟兄詠蟬詩（2005年6月22日）

流連舊樹夜歸遲，縱目星辰隱耀嬉。宇宙蒼茫天有路，翎紗歛歛響先知。夏風薰煦來關顧，游蝶殷勤問佇移。亦悟空鳴難飽腹，凌飛侵曉向新枝。

### 第十一屆李白研討會開幕，觀大會放映新疆圖片，心嚮往之，因賦一律，並呈與會諸前輩君子（2005年7月2日）

七月長風滿宇寰，招邀群彥造邊關。夜猶朗曜思明月，日對奇文解倦顏。碧草高穹連古道，澄湖老鎮向天山。畫圖灼灼心飛遠，早入蒼茫雲海間。

### 贈武漢大學諸同學（2006年6月1日）

凌雲鐵翼鄂州天，鬢舍凝眸路幾天。半月交親濃勝酒，一襟離絮細如棉。和風輕引櫻花道，翠柳護垂江口前。長願艷陽留照麗，東湖水畔珞珈邊。

## 乍聞麗梅學姐是日華誕因賦並呈（2006年9月19日）

欣聞秋日綻幽梅，復睹笑顏方寸開。經載未諳疏影照，傍  
畦早悟漢陰栽。朋高深圳消長夜，月麗城園話暖杯。明歲  
長安君誕近，何妨共賦舊樓臺。

## 次韻林兄十年詩並寄（2006年10月21日）

樊川搖筆亦風流，一覺揚州賦未休。加國舊雲餘寂寂，獅  
城淡月眷繆繆。如真實幻花中客，似醉還醒海上鷗。莫話  
離群耶誕近，為歡十日飲江頭。

## 步十八票先生讀林立十年同賦詩元玉奉呈（2006年10月22日）

最憐修業記生平，馮景禧樓鳥嘯清。世事津梁引明路，建  
安風骨指奇英。新詩揮灑流霞意，近體鋪排細柳兵。早羨  
古今才調絕，從交幸有八年情。

## 五言排

## 步一郡兄十二月六日別友廿二韻元玉敬呈（2006年1月10日）

虎豹初生犢。浮沉耿介身。頗多違俗世。幸未見波臣。  
簷寄蝸居老。君交青眼新。史文深學殖。德性悅群倫。  
業啟明清路。才通經濟人。革沿專法制。治亂究征塵。  
英校名副實。薰風妙化神。合機辭絳帳。破浪理綸巾。

刻燭成篇好。騎驢索句頻。莊諧聯絕對。雅俗惠同寅。  
 粥薄僧猶眾。雲偏雨不均。襟能納江海。志豈在金銀。  
 識盡梁園客。情如皓月輪。賦詩貽別友。上網結芳鄰。  
 憶昔愁千緒。偕朋酒幾巡。沙田歡聚會。蛇口細呻嘔。  
 酬唱中心樂。論談知己親。飯羹雖澀澀。時事自津津。  
 向牖徒雙璧。披星漸一春。鴻篇兄細寫。煉字弟常詢。  
 采柏高崗上。滋蘭吐露濱。乾坤存浩氣。援筆賦茲陳。

## 五 古

拾葉（2006年10月27日）

春鳥振枝去，酬我葉葉綺。斜斜疏簾飄，紛紛碧雨似。  
 平居思古深，願為幽雅士。拾取等閒書，賦吟南窗倚。  
 初拾翻復浮，青蘋嘯呼起。又拾捲趨團，車鳴陣陣駛。  
 三拾餘碾泥，行人急步履。慘慘終成空，頗覺天垂旨。  
 寸心猶未甘，跨步越近里。俯身慇懃蒐，纍纍掬十指。  
 稱慶持握多，忘形雀躍喜。眉髮盡軒揚，笑顏紅過耳。  
 乾坤隨吾偏，雲霞伴我美。垂眸手中物，倏忽面若死。  
 青葉渾無青，殘黃詎忍視。輕拈斷截截，蛙圈片片是。  
 震顛辭掌飛，化塵着地毀。腐葉究非螢，清淚落鉛水。  
 噉啣聲無聞，欲移難動趾。汗滴背盡濕，醒然悟夢裏。  
 人生強拾尋，所遇每如此。

## 七 古

## 奉和 朱老師得鎮江京口焦山〈瘞鶴銘〉五石全拓長歌（2006年11月1日）

焦山漢中南北經，瘞鶴石門稱二銘。寶物早聞思夜夜，際遇元虛難為情。騷客網上忽長歌，樂報邇來夙願成。瘞鶴五石俱全拓，墨痕燈下看分明。新詩鏗然錦繡列，一瀉千里筆飄靈。歷代流傳往史識，免起鶻落勾真形。嗣後繆颺點復點，拓影飛來自光繩。此銘貌奇古樸絕，肆力渾雄若奔鯨。開張縮聚雷霆震，似聞當日壁巖傾。列印片段墨香溢，千年未消喜還驚。按撫凸凹感痕深，畫鉤難毀沉滄溟。歲月悠悠盡苦劫，崖上江中猶能生。翻篋上網蒐典籍，啟篇更仰昔日榮。金石方家黃伯思，頻言淡遠青目凝。欲觀山樵米襄陽，炎夏描做戴月星。放翁踏雪尋銘夜，呼朋侑酒傍羹羹。復古俊彥王元美，摹擬只發嘖奇聲。今有嶺嶠丹砂子，珍之重之古道承。展拓芸窗繹古意，賦詠役役更營營。又招同好共酬唱，逍遙靜待高風冷。浸園招宴五侯鯖，品賞研磨酒令行。客散徐徐興未休，撇捺細摹直秋暝。擘肌分理筆筆熟，心得著書車駕輕。世上愛物應如此，雅作翻感因心誠。況逢洛社才人眾，揚雄次韻步庚青。書法本來老國手，喻懷七絕豈模稜。一和百篇揮毛穎，野鷺騰舞硯池腥。麗辭輪王亦抖擻，聯聯妙可嵌柱楹。數曲陽春人不見，雲低峰翠尚惺惺。長歌潛和驅神思，鳳藻馳飛月下扃。月下有人空落寞，早無佳句立孤亭。幸曾少年強臨帖，聊話一二

付吟旌。春蚓秋蛇濡桿禿，法書半爪亦知名。大字誅文勢俊逸，能教仙鶴安幽冥。惜哉身世尋無主，後人紛擾不得寧。不得寧兮欲揮翰，由來書道百煉精。縱無白裙延子敬，拚持愚志對崢嶸。崢嶸世態欺我少壯字未穩，魑魅盈閭張牙暗箭似利兵。何當倩賜五石拓本日對雲寫，練就巨椽頂天立地盡訴不平鳴。

### 青馬大橋吟（2006年12月4日）

美國之金門<sup>註1</sup>，霧縹蒸橋遮三藩。香港之青馬<sup>註2</sup>，水雲娛眸接廣廈。懸索汽車鐵路橋，東瀛明石<sup>註3</sup>對此寂寞愁難銷。意國新築墨西拿<sup>註4</sup>，長冠天下竣期遙。白日港龍臥蔥綠，青衣馬灣俱為束。巋然屹屹欲百米，下臨碧海水紋曲。閒負百萬噸，鬚莖徑丈長。十載高雷聆宇內，幾柱碩爪立蒼茫。腹納乾坤道，上下任翱翔。只聞過客速，未憂颺風狂。夕陽金灑湛藍空，漸黃昏兮天赤紅。雲轉陰兮無語，橋張燈兮化虹。珠帶璀璨，色彩斑斕。光瑩貫渚，鋪垂海間。鋼絲萬絳裁三角，豎琴弦動揮瀛寰。千車從容馳碧落，巨纜連綿懸弧彎。我欲駕兮此橋上，風之速兮開篷而聘望。復停轎車兮眺景於高臺，倚闌欄兮開宇宙之個唱。日景麗兮收像機，夜之粲兮星月稀。扶素手以俯瞰，閉雙目而欲飛。東涌艇船去點點，機場巴士聽騾騾。偶吸青嶼之清氣，靜候赤日之赫羲。人生饒暇當此至，何必拘身公務事。觀景臺前忘俗塵，綦懷鬱結盡舒伸，心涵天地對不辰。莫謂香江人多地若丸，且看青馬默默持守亦驚舉世聞。

---

註1：金門大橋乃世界第一座跨距千米以上之懸索橋，長約一點三公里。

註2：青馬大橋為全球最長行車及鐵路吊橋，全長二點二公里。

註3：明石海峽大橋乃目前全球最長跨海大橋，全長三點九公里，亦為日本三大橋之一；惟無鐵路軌，並非汽車鐵路兩用橋。

註4：意大利擬建全球最長四公里跨海大橋，名曰「墨西拿吊橋」，預料二零一二年完工。